

dalla radunonza generala dalla Surselva Romontscha (SR),
venderdis, ils 31 da matg 2019 allas 20.00
ell'aula a Danis

Tractandas:

1. Avertura e beinvegni
2. Tscharna dils dumbravuschs
3. Protocol
4. Rapport annual 2018
5. Rendaquen 2018
6. Fixar la contribuziun annuala
7. Elecziuns
8. Ulteriuras informaziuns
9. Program da lavur 2019
10. Varia

1. Avertura e beinvegni

Il president dalla SR Vitus Gartmann arva la radunonza fagend in cordial beinvegni a tuts presents. In special beinvegni admetta il president a Michael Friberg (forum cultural Breil), Martin Gabriel (secretari Lia Rumantscha) e Tresa Deplazes (presidenta Pro idioms Surselva). Grond plascher fa era la presenza dils representants dalla vischnaunca e dallas medias.

Il president ha retschert differentas perstgisas. Ellas vegnan prelegidas e pridas per enconuschientscha.

La gliesta da tractandas ei vegnida publicada el Fegl official dalla Surselva. Las commembras ed ils commembers han retschert las tractandas per posta. La gliesta da tractandas vegn approbada unanimamein.

Michael Friberg beneventa medemamein ils presents. El presenta cuortamein il forum cultural Breil. En in emprem pass porscha el ina survesta davart ils usits, las tradiziuns, igl art e las guidas culturalas. Plinavon metta el Sep Mudest Nay en connex cull'impurtonza dil lungatg romontsch ed il dialect local. En sia presentaziun vegn era la historica locala tematisada. Michael siarra sia presentaziun cun metter in focus sill'architectura, la cultura e las differenzas publicaziuns.

2. Tscharna dils dumbravuschs

Francestg Friberg e Donat Nay vegnan elegi sco dumbravuschs.

3. Protocol

Il protocol dalla radunonza generala 2018 ei publicaus silla pagina d'internet dalla SR, www.surselva-romontscha.ch, ultra da quei vegn el tenor giavisch projectaus vid la preit. Il protocol vegn approbaus unanimamein.


4. Rapport annual 2018

La Surselva Romontscha ei sestentada cuntinuadamein da mantener, promover e rinforzar la schientscha pil romontsch e l'enrihonta cultura romontscha el mintgadi. Seigi quei cun novas ediziuns e cun sustegn finanziel da projects e publicaziuns romontschas sco era actualmeins cun engaschi per la pressa romontscha. Quellas incaricas pretendan repetitivameins engaschi intensiv, regenereschan denton era la duida satisfacziun.

La radunonza generala 2018 ha giu liug ils 18 da matg en la biala Val Lumnezia a Vella. In'ulteriura ga sa la suprastanza beneventar in vast diember da commembers, interessai ed amitgs dil romontsch. In' intensiva ed engaschada discussiun ha la moda e maniera dil susteniment e manteniment dalla pressa romontscha en general ed en special en Surselva caschunau! La suprastanza dalla SR propona e sustegn detschartameins igl agir e las stentas dalla LR en caussa ed exprima sia posiziun en in scriver per mauns dalla suprastanza dalla LR.

Duront igl onn vargau ei la suprastanza dalla SR sereunida ad 8 sesidas da suprastanza ed ulteriuras sedutas ed occurrenzias ein vegnidas frequentadas da consuprastants.

La consuprastanta Andrea Kobler ha demissiunau per motivs da temps. Ella vegn remplazzada da signur Marc Elias Solèr da Cuera. Donat Nay vegn renominaus unanimameins per la suprastanza dalla LR.



Ediziuns e sustegn finanziel

Cun l'ediziun d'in ulteriur Tschespet augmentescha la SR la retscha tradiziunala da cudischs litterars sursilvans. Il Tschespet 77 "Verdads cun in surrir" ei dedicaus a Donat Cadruvi ch'ei morts avon gest 20 onns. L'ediziun ed il lectorat ei vegnida elaborada da signur prof. Isidor Winzap. La cuviarta, che simbolisescha las differentas historiettas dil niev Tschespet, ei vegnida creada dad in dils fegls dil sribent, numnadameins da Beat Cadruvi. La vernissascha ha giu liug ils 2-12-2018.

Sco usitau ha la SR era egl onn vargau susteniu e promoviu differentas instituziuns, publicaziuns e projects romontschs tenor sias pusseivladads.

Engraziament

Il president engrazia pigl engaschament prestau e la buna collaboraziun a tuttas consuprastantas e tuts consuprastants. Medemameins in grond engraziament s'audi a Donat Nay e David Flepp ch'assistan sco punt ligionta cun la LR allas sesidas. In special engraziament era allas collaboraturas dad in plus, oravontut a Carin Coray e Monica Carigiet, per lur lavur da biro per la SR.

In grond engraziament va a tuttas e tuts presents che sustegnan e collaboreschan cun la SR per nies romontsch.

5. Rendaquen 2018

La cassiera Flurina Cantieni presenta ils different sustegns finansials e silsuenter il quen. Ella explichescha detagliadameins las singulas posiziuns. Il quen siara cun entradas da CHF 65'541.60 ed expensas da CHF 57'609.40, pia cun in gudogn da CHF 7'932.20. Igl agen capital munta a CHF 126'897.01.

Cunquei ch'ils revisurs ein buca presents vegn il rapport dils revisurs projectaus. El rapport proponan ils revisurs d'approbar il quen sco presentaus. Il president tschenta en votaziun il quen, il qual vegn approbaus unanimamein.

6. Fixar la contribuziun annuala

La suprastanza propona da schar las contribuziuns sco tochen da cheu:

- commembers singuls CHF 30.-
- secziuns/pleivs/uniuns CHF 50.-
- persunas giuridicas CHF 100.-

Quella proposta vegn acceptada unanimamein.

Las contribuziuns per vischnauncas ein vegnidas fixadas egl onn 2014 per in cuoz da 5 onns e stattan quei onn danovamein en votaziun.

La suprastanza propona da schar las contribuziuns sco tochen da cheu:

- contribuziun da tschèp CHF 250.-
- contribuziun per habitont CHF -.20

Era quella proposta vegn acceptada unanimamein.

7. Elecziuns

En suprastanza dat ei pliras demissiuns. Vitus Gartmann ha decidu da demissionar sco president dalla Surselva Romontscha. Angelica Arpagaus e Jan-Andrea Bernhard demissioneschan sco suprastants. Els tuts han susteniu ils projects dalla Surselva Romontscha cun grond engaschi e persunter admettein in grond engraziell.

La suprastanza propona Nadja Huonder da Rabiun/Cuera sco nova persuna en suprastanza. Quella proposta vegn acceptada unanimamein. La suprastanza beneventa Nadja Huonder el niev uffeci e selegra da collaborar cun ella.

La suprastanza propona Alberto Palaia sco niev president en suprastanza. El vegn ellegius unanimamein e benventaus cun in applaus en sia nova funcziun. La suprastanza gratulescha sil niev uffeci e selegra silla collaboraziun.

Sin basa dallas midadas en suprastanza ha la Surselva Romontscha las suandontas delegadas ed ils suandonts delegai :

Bearth Rita, Platta
Cabalar Martin, Cumbel
Cantieni Flurina, Laax
Deplazes Tresa, Schnaus
Friberg Frankestg, Danis
Glantz Anne, Fidaz
Huonder Nadja, Cuera
Palaia Alberto, Glion
Schmid Toni, Danis
Solèr Marc Elia, Cuera
Solèr Paul Valentin, Lumbrein

Pils quater posts vacants propona la suprastanza Vitus Gartmann (Sevgein), Jan-Andrea Bernhard (Strada), Retus Giger (Surrein) e Daniela Hefti (Flond). Las personas numnadas vegnan elegidas unanimamein sco novas delegadas e delegai dalla Lia Rumantscha.

8. Ulteriuras informaziuns

Orientaziun da Martin Gabriel ed Andreas Gabriel

Martin Gabriel engrazia als supprastants che han demissiunau. El menziuna la difficultad da survegnir glied per quels posts.

En in emprem pass plidenta il rapport cumpariu ella gasetta sco contribuziun meins retschercada. El rapport vegn tematisau co la Lia Rumantscha dispona lur daners. Recumandaziuns sco era critica ein integradas el rapport ch'ei vegnius publics.

Plinavon puntuescha Martin che la lescha da lungatgs drovi meglieras incumbensas.

En connex cun las medias romontschas eis ei decidiu che la nova strategia da medias vegn realisada tenor il status quo cun RTR sco niev partenari. Editurs privats ed era publics han signau ina cunvegna pertuccont la nova plattafuorma che vegn realisada. Actualmeins vegnan las cuvegns da prestaziun fixadas.

Medemamein actuals ei il niev project da digitalisaziun che vegn concepiv dalla Lia Rumantscha.

Andreas Gabriel informescha davart las festivitads a Zuoz. El presenta il program detagliu dalla fiasta da 100 onns Lia Rumantscha als presents dalla raduonza.

Informaziun davart inplus

Martin Gabriel informescha ch'ei seigi deplorablamein buca reussiu al biro dad inplus da survegnir avunda incumbensas per saver occupar lur collaboraturas a liunga vosta.

Aschia han els stuiu prender la decisiun da serrar il biro per la fin settember 2019. Il problem central se basa sil fatg ch'ei hagi dau neginas novas incumbensas. Las collaboraturas Carin, Monica, Katrin e Silvana han tuttas anflau ina nova piazza da lavur.

9. Program da lavur 2019

Restampa da „la strietta“

A caschun dalla davosa raduonza generala ei la proposta vegnida fatga da restampar il cudisch „La strietta“ ch'ei oriundamein vegnius scretts digl autur Otfried Preussler“ La strietta“ ei franc in cudisch che ha gia inaga accumpignau ina fasa da nossa veta, jeu hai per exempel legiu il cudisch ella scola primara. Ils davos onns ei il cudisch denton staus exhausts.

La strietta tracta dalla dunna che ha deplorablamein pér 127 onns. Per quei motiv vegn ella buca prida seriusa dallas strias pli veglias. Aschia ch'ella astga era buc saltar ensemen cullas grondas strias al barlot dallas strias. Cunquei ch'ella ei aunc buc ina gronda stria, vul ella silmeins esser ina buna stria – Cun quella decisiun entscheiva denton gl'entir schischuri.

En suprastanza dalla Surselva Romontscha ein tut ils pass preparatorics per la restampa da 300 tocs fatgs ed il cudisch cumpara el decuors dalla stad.

„Emilia ed ils quens“ da Tonja Pelican

Tonja Pelican, l'autura dil cudisch ei carschida si a Lumbrein en Lumnezia. A Turitg alla scola aulta da pedagogia ei ella sefetschentada en rama da sia lavur da bachelor cul tema discalculia. Il resultat da quella lavur porta il num „Emilia ed ils quens“. „Emilia ed ils quens“ ei scret sco era illustrau da Tonja Pelican. Ei setracta dad in cudisch da circa 50

paginas. La SR vegn ha susteniu il lectorat e vegn aunc en quei onn a publicar il text en in sempel cudischet per in e scadin che ha interess.

Il cuntegn presenta differentas ed interessantas tematicas, sco per exempel difficultads en in rom, cheu concretamain matematica, e co ir entuorn cun quellas. Plinavon ei disdir, camerats che fan beffas, turpetg, ir a scola en ina classa pintga integrada, amicezia, la situaziun cun geniturs ch'ei sparti ulteriurs temas ch'ei centrals el raquent. La finfinala empren Emilia el decuors dil raquent era da vesser tgei ch'ins sa far bein e co ins sa luvrar cun las atgnas fermezias. Entras quella varietad tematica ed era il bien lungatg ei quei cudisch fetg adattaus per las scolas romonschas.

10. Varia

Lorenz Alig engrazia a Vitus persunalmein per la buna collaboraziun. El hagi giu l'impressiun che Vitus hagi adina giu ina lingia fetg grada e mussau capientscha el dretg mument. Plinavon gratulescha el ad Alberto per la nova elecziun.

Martin Lombriser pren il plaid per render atenziun al diever dil romontsch el mintgadi. Oravontut puntuescha el certs plaids tudestgs ch'ins stuess dispet duvrar per romontsch ella veta quotidiana.

Allas 21:30 siara il president la radunonza generala engraziand per il sustegn ed engaschi da tut ils presents ed alla vischnaunca Danis-Tavanasa per la hospitaliad.

Suenter la radunonza offerescha la Surselva Romontscha in aperitiv.

Glion, ils 20 da zercladur 2019
l'actura

